

四庫全書

史部

欽定四庫全書

西湖遊覽志卷十三

明 田汝成 撰

南山分脉城內勝蹟

城隍

鳳山門候潮門永昌門清泰門慶春門艮山門湧金門
鳳山門在城南與北關門對俗稱正陽門又東南二
里許宋有嘉會門南近鳳凰山為禁垣北關有和寧

門入和寧門透大內直南有麗正門杭州城垣創於隋楊素者周廣三十六里有奇廣於錢鏐者七十里元時禁天下修城以示一統而內外城隍日為居民所平至正十六年張士誠陷姑蘇據浙西五郡十九年發松江嘉興湖州杭州民夫復築焉晝夜併工三月而完城周六千四百丈有奇高三丈厚視高加一丈而殺其上得厚四之三焉舊城包山距河故南北長時則自艮山門至清泰門以東視舊則拓開三里

而絡市河於內自候潮門以西則縮入二里而截鳳山於外禮部尚書貢師泰為之記明興遣曹國公李文忠將兵取杭州守將潘元明納款城隍皆如元舊宋時和寧門內有學士院院內有玉堂摘文堂王仲衡詩云玉堂晝永暑風微簌簌飛花落小池徙倚幽欄憑問訊夏鷺飛出萬年枝

候潮門在城東而近南宋時有便門保安門今廢永昌門在城東宋名新門俗稱草橋門

清泰門在城東宋名崇新門俗稱薦橋門又稱螺螄門

慶春門在城東宋名東青門俗稱菜市門門之左宋有皇城司營武安泉水甚佳

艮山門在城東而近北俗稱壩子門艮山者南山之畫脈也高不踰尋丈今已陵夷莫可指索沿城五六里漫為平原土沃疇腴禾藪芄茂蓋餘氣之散衍耳湧金門吳越王建門內有湧金池金華令曹杲所鑿

也

衢巷河橋

入鳳山門而北至鎮海樓其街之東為雲錦橋義和坊
義井巷集義巷通江橋懷信坊西為仁孝坊壽域坊天
慶坊保民坊長慶坊

雲錦橋宋稱六部橋東通候潮門大河之水自龍山
關入鳳山水門從南而北首過此橋次安和橋黑橋
州橋通江橋會茆山河次望仙橋新宮橋會小河次

三聖橋佑聖橋榮府橋柴埭橋積善橋清泰橋豐樂
橋油局橋惠濟橋仙林橋登雲橋梅家橋折而西次
通濟橋葛家橋天水院橋出武林水門洗馬橋抵德
勝壩官商馳騫舳艫相銜晝夜不絕 六部橋之對
宋有六部部各有尚書侍郎郎中員外郎凡二十四
司吏部掌文武官吏選試擬注資任遷叙蔭補考課
之政封爵策勲賞罰殿最之法其屬四曰尚左尚右
侍左侍右曰司封曰司勳曰考功戶部掌人戶土地

錢穀之政貢賦征役之事其屬四曰左曹右曹曰度
支曰倉部曰金部禮部掌禮樂祭祀朝會宴饗學校
貢舉之政其屬四曰儀部曰祠部曰主客曰膳部兵
部掌儀仗鹵簿武舉民兵廂軍土軍蕃軍四夷官封
承襲之政輿馬器械之數土地城隍堡寨烽堠之圖
籍其屬四曰兵部曰職方曰駕部曰庫部刑部掌刑
法獄訟奏讞赦宥叙復之政敕律章程之式其屬四
曰刑部曰都官曰比部曰司門工部掌城郭宮室舟

車器械符印錢幣山澤苑囿河渠之政營繕飭化之法其屬四曰工部曰屯田曰虞部曰水部其六部監門紀部官卯未之出入病疾之暫告與謁制之可否署在大門之內 又北為尚書省中書省門下省樞密院宋初門下省設官十有一侍中侍郎左散騎常侍各一人給事中四人左諫議大夫起居郎左司諫左正言各一人中書省設官十有一中書令侍郎右散騎常侍各一人舍人四人右諫議大夫起居四人

右司諫右正言各一人尚書省設官九尚書令左右僕射左右丞左右司郎中員外郎各一人其屬六部蓋三省長官加平章政事者皆宰相職也初時別置中書於禁中與樞密使對政謂之兩府事闕中書者中書宣奉門下省審覆付尚書省施行事闕樞密者樞密宣奉門下省審覆付帥府施行尚書門下雖尊官不得參襄密勿故中書之權特重熙寧改制以侍中中書令尚書令官高不除而以左僕射兼門下侍

郎行侍中之職右僕射兼中書侍郎行中書令之職
建炎初以左右僕射並加同中書門下平章事侍郎
改叅知政事而三省合為一體乾道間改左右僕射
為左右丞相至是三省之名雖存而官非初制矣樞
密院掌軍國機務兵防邊備戎馬之政招募閱試遷
補屯戍賞罰之事設官十樞密使知院事同知院事
樞密副使僉書院事同僉書院事都承旨副都承旨
檢詳編修而樞密使類以宰相兼之自僉書已上皆

謂執政中為都堂為兩府會議之所刻周官一篇於
正坐之屏堂中刻累朝詔勅文劄各有跋語自諫議
大夫而下別為諫院省院監門封樁安邊所俱在大
門之內

羲和坊東通安和橋東有勝安倉即聖安寺故址寺
元貞二年建至正間毀為軍器庫今為倉基

義井巷東通黑橋

集義巷東通州橋宋時與玉牒所貴恕坊對東有預

備倉

通江橋本名慶元橋其東宋有都茶場雜買務權貨
務雄武營北為太醫局又東為保安門今塞橋之南
為過軍橋北為鄉義巷東為三皇倉舊為三皇廟
懷信坊俗稱糴糶巷與長慶坊對近朝天門而東至
望僊橋者其北宋有裕民坊

仁孝坊俗稱清平巷西通清平山開元寺者其對宋
有登平坊

壽域坊在白馬廟南西通七寶山山側宋韓侂胄第
第近太廟鑿山為園借擬宮禁引青衣泉注於閱古
堂秀石環繞絕類香林冷泉之景有桃坡十二級夜
宴則殿巖用紅燈數百出於桃坡之後以燭之其巖
洞最勝者曰雲岫危峰隱石淺灣深沼窈窕溥泓自
比於洞天福地云

天慶坊宋稱太廟巷俗稱蘭子坊巷宋有太宗正司
以叙族姓昭穆治其家政其南有玉牒所宗正寺元

時有權茶提舉司

保民坊即城隍廟街西通金地山宋有司農寺太府寺將作監軍器監諸司諸軍審計司 司農寺隸戶

部以幾察廩庾之出納少卿張維記云漢置九卿大司農其一也今倣周制為六部以戶部掌國計而司農猶為列卿贅矣况倉儲出納自昔太倉令主之蓋大司農之屬猶今之倉部也以列卿而行太倉令日惟倉部要束是聽位雖尊勢出倉部下至於軍餉肅

給罷於奔命世謂走卿辱矣 太府寺掌軍國之經費與縣官之私養奉帑幣定權量治鹽茗之劑劑班內外之廩稍覆其名數而鈎磨之頒財用於受藏之府周知入出斥幣餘互市之積以便貿易比物奠價俾從其抵儲藥物以除札瘥叙財幣以待上之賜好制券以通商賈 將作監掌營繕之事行都工作多以京尹畿漕分任之故監官多闕員凡臺省之久次與郡邑之有聲者寄徑於此號儲才之地 軍器監

掌繕諸軍器械其御前所用者別有提轄歸之殿司
諸司諸軍審計司分為二局各乘財用稍食之數
而會稽之屬太府寺

長慶坊俗稱石龜巷西通石佛山宋有都奏進院即
智果院舊址也掌王言出納與四方章疏其南為三
執政府乃宰相私第也內有四眼井

鎮海樓舊名朝天門吳越王錢氏建規石為門上架
危樓樓基疊石高四仞有四尺東西五十六步南北

半之中為通道橫架交梁承以藻井牙柱壁立三十
有四東西闕門對闢名曰武臺夷敞可容兵士百許
武臺左右北轉登石級兩曲達於樓上樓之高六仞
有四尺連基而會十有一仞貯鼓鐘以司漏刻元至
正間平章喀喇慶通改為拱北樓皇明洪武八年行
省劉王兩叅政者失其名改為來遠樓既榜揭遣拆
字人張乘槎者往視之槎曰三日內主哀喪之事如
期王母死劉以歷日紙坐法王延乘槎問故對曰來

帶喪形遠從哀帶哀形旁之兩點相續者淚形也頃
之參政徐本改為鎮海樓詹孟舉署扁其陰篆書吳
山偉觀四字成化十年燬明年重建疊構三層闌楯
周繞巨鐘鼗鼓左右懸架更嚴之夕鼓鑿角咽按箭
行籌似落霄漢間規制弘遠矣 趙子昂同慶通丞
相上拱北樓詩云城上高樓接太霞令嚴鐘鼓寂無
譁提疆內向三千里比屋同封百萬家心在江湖存
魏闕身隨牛斗泛僂槎舉頭便覺長安近時倚闌干

望日華 楊仲弘詩云殷地鼓鼙迎日出倚天梁棟
傍雲浮北瞻帝闕三千里南控臣藩二百州江海無
波沉罔象旌旗垂野駐貔貅鸞迴麗榜多深意繡袞
於今有魏牟 高得暘詩天府南來第一州胥丘東
起最高樓水分兩淞趨都會地接三吳控上游雲外
鼓鼙嚴夜禁城中車蓋樂春遊玉堂政暇新題扁彩
筆飛光射斗牛

自鎮海樓而北至清河坊其街之東折而北為布市巷

沙皮巷正東為興禮坊西為吳山坊融和坊清河坊
布市巷宋時為貿布之所東通望僊橋

沙皮巷舊名清平坊宋時酒館也至今沽肆不徹
興禮坊西與清河坊對東通新宮橋

吳山坊內有大井周四丈吳越時韶國師所鑿品其
水為錢唐第一蓋山脈融液獨源所鍾不雜江湖之
水泓深瑩潔異於衆泉宋淳祐丁未大旱城井皆涸
獨此井日下萬綆不減不盈都人神之安撫趙與憲

立祠其畔洪武初叅政徐本立石刻吳山第一泉五
字紀宋事於碑陰內有金銀雜色魚長數尺者或隱
或顯相傳來自井底泉眼中者

融和坊宋稱灌肺新街內有灌肺嶺

清河坊與興禮坊對宋有張循王俊賜第在焉俊封
清河郡王故稱清河坊今改旬宣街

自興禮坊而北至賢福坊為灌肺巷通和坊普濟巷寶
佑坊五間樓自清河坊而北至文錦坊為太平坊惠民

坊巾子巷中瓦巷甘澤坊

灌肺巷西與融和坊對內有灌肺橋宋為珠子市

通和坊東通金波橋宋有花月樓又東為熙春樓南

瓦子又南為抱劍營漆器墻沙皮巷融和坊其西為

太平坊巾子巷獅子巷皆為瓦市各有等差酒客登

門則有提瓶獻茗者謂之點花茶登樓甫飲一杯則

先與數貫謂之支酒然後呼喚提賣趕趁祇應者亦

皆紛至浮費頗多妓家富者酒器沙鑼冰盆火箱粧

盒之類悉以金銀為之帳幔裊褥多用錦綺器玩珍
奇他物稱是下此者亦競尚鮮華自酒器首飾被卧
衣服之屬各有賃者

普濟巷東通普濟橋又東為柳翠井在宗為抱劍營
地相傳紹興間柳宣教者尹臨安履任之日水月寺
僧玉通不赴庭叅宣教憾之計遣妓女吳紅蓮詭以
迷道詣寺投宿誘之淫媾玉通修行五十二年矣戒
律凝重初甚拒之至夜分不勝駘蕩遂與通焉已而

詢知京尹所賺也慚怩而死恚曰吾必敗汝門風宣
教尋亡而遺腹產柳翠坐蓐之夕母夢一僧入戶曰
我玉通也既而家事零落流寓臨安居抱劍營柳翠
色藝絕倫遂隸樂籍然好佛法喜施與造橋萬松嶺
下名柳翠橋鑿井營中名柳翠井久之臯亭山顯考
寺僧清了謂淨慈寺僧如晦曰老通墮落風塵久矣
盍往度之如晦乃以化緣詣柳翠為陳因果事柳翠
幡然萌出家之想如晦乃引見清了清了為說佛法

奧旨及本來面目末且厲聲曰二十八年煙花業障
尚爾耽迷耶柳翠言下大悟歸即謝鉛華絕賓客沫
浴而端化歸骨臯亭山從所度也

寶祐坊東通寶祐橋其南宋時有榮王府看街樓

五間樓在亨橋東與三元樓對宋時民間市樓之有
名者曰三元曰五間曰熙春曰賞心曰花月曰日新
其厨店分沽則有嚴厨翁厨任厨陳厨周厨沈厨鄭
厨康沈銀杓等店每樓各分小閣十餘器皆銀飾各

有私名妓數十輩凭檻招邀謂之賣客又有小鬟不
呼自至歌吟強聒以求支分謂之擦坐有吹簫彈阮
息氣鑼板歌唱散耍等人謂之趕趁有老嫗以小爐
炷香為供者謂之香婆有以法製青皮杏仁半夏礮
砂荳蔻小蠟茶香藥韻薑砌香橄欖薄荷至酒閣分
俵得錢謂之撒嚙有賣玉面狸鹿肉糟決明糟蟹糟
羊蹄酒蛤蚧柔魚鰕茸鱓乾者謂之家風有賣酒浸
江蟪章舉礪肉龜脚鎖管密丁脆螺蟹醬法鰕子魚

蟹魚諸海味者謂之醒酒口味凡下酒羹湯任意索
喚雖十客各欲一味亦自不妨過賣鐺頭記憶數十
百品傳唱如流即時供應酒未至則先設看菜數碟
及舉杯則又喚細菜如此屢易愈出愈奇歌管歡笑
之聲每夕達旦徃徃與朝天車馬相接雖暑雨風雪
不少減也

賢福坊一名東文錦坊俗稱壩東巷舊傳江湖至此
有壩限之東通平津橋俗稱貓兒橋

太平坊東與通和坊對

惠民坊洪武十七年置醫學於此

巾子巷舊名市南坊

中瓦巷之南宋時有武林園通後市街稍北為龍翔宮

甘澤坊與寶祐坊對

文錦坊西通三橋街者俗稱洋壩頭

自賢福坊而北至義和坊為安平巷永清巷日新巷自

文錦坊而北至壽安坊為連二巷修義坊富樂坊最樂坊教睦坊泰和樓積善坊秀義坊

安平坊東通方便橋

永清巷舊名蘭陵坊俗稱水巷東通永清橋

日新巷宋有日新樓東通日新橋

義和坊西與壽安坊對東通芳潤橋

連二巷宋有連二茶坊

脩義坊俗稱肉市巷又稱姜椒巷西通軍將橋

富樂坊俗稱賣馬巷內有狗兒嶺今夷為平路

最樂坊舊名衆樂坊俗稱虎跑巷後通大瓦子亦曰
上瓦宋時瓦子有名者十有三在城則南瓦中瓦上
瓦下瓦蒲橋瓦城外則便門瓦候潮門瓦小偃瓦新
門瓦薦橋瓦菜市瓦錢湖瓦赤山瓦舊瓦嘉惠瓦新
瓦艮山瓦羊坊橋瓦王家橋瓦龍山瓦皆羣花所聚
蓋取聚則瓦合散則瓦解之義也

教睦坊一名敦睦巷其南宋有銀甕酒庫

泰和樓宋時城中官沽有八樓曰和樂曰和豐曰中和曰春風曰泰和曰西樓曰太平曰豐樂皆屬戶部點檢所樓各有庫每庫祇直數人官妓數十人飲客登樓則以名牌點喚侑觴謂之點花牌金銀器皿取自庫中徃徃學舍士夫所據外人未易登也

積善坊俗稱上百戲巷西通施水坊橋內有幢子巷秀義坊俗稱下百戲巷內有東平王廟

壽安坊俗稱官巷又稱冠巷宋時謂之花市亦曰花

團蓋汴京有壽安山山下多花園春時賞燕爭華競靡錦簇繡圍移都後以花市比之故稱壽安坊

自壽安坊而北至衆安橋其街之東為武志坊戒民坊新安坊西為忠孝坊修文坊里仁坊保信坊定民坊百福巷弼教坊十官宅巷棗木巷資福巷下瓦巷

武志坊東通李博士橋

戒民坊東通棚橋宋為行刑地故號鬼門闕又曰陰山道入巷過棚橋宋時謂之棚樓粧點勾欄之所其

對為中和樓乃銀甕中庫元時平準庫在焉

新安坊俗稱新安橋巷有千勝將軍廟

忠孝巷俗稱崔家巷

修文坊西通洪福橋宋有將作監

里仁坊西通鞞鼓橋宋稱陶家巷

保信坊俗稱剪刀股巷

定民坊與戒民坊對俗稱中棚巷舊有棚心寺佛牙

塔雙井

百福巷舊有百福院唐天福中錢氏建於城外乾道
五年徙棚橋至正間燬

弼教坊俗稱狗兒山巷宋名睦親坊今有睦親井尚
存有宗學在焉先是宋分宗子為六宅宅各有學南
渡後惟置睦親一宅紹興四年始置諸王宮大小學
嘉定九年改宮學為宗學凡曳籍玉牒者無間親疎
皆肄業焉三年一試如太學法有明倫立教汲古等
堂貴仁立愛大雅明賢懷德升俊等齋自此而西街

之南為蕭相國祠又西為金鈞巷街之北為新慶巷
北通區擔嶺隱隱起伏蓋南山之盡脈也又西為花
園巷又西為洗瑟橋

十官巷宋時有宗室之子十人居此故名

棗木巷西通石湖橋宋時范成大所居號石湖故名
其北為結縛橋相傳宋時下瓦勾欄觀者雲集時馬
光祖尹京令行禁止得遺物者結縛于此以待失者
故名其東為區擔嶺宋為沂王府

下瓦巷亦曰北瓦內有勾欄十三座北有瓦子橋舊
名象樂橋

自興禮坊而東至舊達達城其街之南為沙皮巷布市
巷過新宮橋為夾牆巷北為熙春橋街清泠橋街鍾公
橋街佑聖觀街

新宮橋俗稱宗陽宮橋小河之水自新宮橋分派從
東而西過鍾公橋清泠橋折而北過熙春橋灌肺橋
金波橋普濟橋保祐橋巧兒橋亨橋舍人橋方便橋

永清橋日新橋芳潤橋李博士橋棚橋新安橋度生
橋北橋軍頭司橋清遠橋百萬倉橋折而東與大河
合流出武林水門俗稱市河是也其支派自觀橋而
西合清湖河以北亦曰市河

夾牆巷宋時德壽宮牆外委巷也

熙春橋宋有熙春樓南瓦子

清冷橋南通沙皮巷北通漆器牆

鍾公橋通上下抱劍營本名寶劍營錢王屯軍之所

又北通集慶巷

佑聖觀街自宗陽宮折而北東為巡鹽察院北為市
舶司佑聖觀之東為武林驛西為錢唐學水亭子

自清河坊而西至杭州府治其街之南為康裕坊吳山
坊大隱坊安榮坊懷慶坊豐和坊龍舌頭北為南新街
清望街德化街十三灣巷泰和坊天井坊文明坊

康裕坊俗呼八作司巷宋有御史臺中為臺廳謂之
朝堂有御史閣位廳以內為西監察位又內為殿中

位又內為中丞侍御史位臺獄之門扁曰四推南渡
鮮置對有屬臺官讞問者則刑察就聽於大理之獄
吳山坊直北與後市街對內有報恩寺

大隱坊一名小僊巷宋徽宗時有處士徐奩居此徵
辟不起賜號冲晦先生

安榮坊上通金地山直北與華光巷對

懷慶坊由此以登寶月山者

豐和坊近龍舌頭可通清波門者在天井坊對

龍舌頭蓋當寶月蛾眉兩山之際蜿蜒而來若龍舌之吐者

南新街內有憐忠祠

清望街舊名新街即後市街

德化坊舊有仁和衛

十三灣巷分東中西三道內有惠安寺

泰和坊俗稱華光巷亦稱糯米倉巷

天井坊在布政司右舊名通瀾坊今廢其對山有天

井按臨安舊志所載城中之井自相國而下有名者六十自吳山而下有名者三十有一初無天井之名獨於黑龍潭云在寶月山一名天井山天晴則潭水碧色有雨則先期變黑蓋指黑龍潭為天井也嘉泰二年清河坊大火郡守丁常任行視火場得潭井於御史臺西小巷中深五十餘尺廣十餘尺淘甃清潔甘泉迸盈得建炎錢數十枚其堙塞必在建炎後也文明坊即中和坊亦名淨因坊閘兒頭從此而北宋

為樓店務又北為戒子橋元為燒鈔庫今為黃冊庫
又北為定安橋宋有慈幼局施藥局 慈幼局淳祐
七年建凡民間遺棄小兒有願收養者月支錢一貫
米三斗二歲乃止無人收養者官為僱乳有願子者
從官請之 施藥局淳祐八年建元時改為醫學提
舉司今併入都指揮使司

杭州府前為宣化橋其對為仁美坊安阜坊其西為流
福坊

宣化橋宋時俗稱慎來橋至今仍之謂好訟者與作惡而被刑者至此皆有悔心也

仁美坊俗稱石板巷宋時有三通判衙又東為水溝巷

安阜坊舊名近民坊從此而南有淨因塔俗稱塔兒頭

流福坊在府西水口透城外引湖水從西而東經府前至文明坊折而北過戒子橋定安橋凌雲橋福寧

橋轉運橋合湧金池之水今水口雖淤而條脈猶可
考也蓋宋已前自錢湖門至錢唐門引湖水入城者
為明溝五道暗溝十五道明溝者一為清波閘即流
福水是也二為湧金閘即湧金池是也三為集賢亭
水窰四為集賢亭後閘今成化間所導經蓮花橋出
曲阜橋者是也五為菩提寺閘暗溝者李泌所開六
井沈文通所開南井蘇軾所開新溝通貓兒橋及雄
武營者而布政司前百獅池西通西湖東出水於普

濟橋又仁和學府學前亦有暗溝繞櫺星門出於凌雲橋者是也餘不可考夫久廢者固不可復矣有踪跡可尋而坐視堙梗非郡城之利也

後市街宋時為柑子園有龍翔宮孟太后宅李皇后宅全皇后宅六眼井直南與吳山坊對先是宋時車駕朝饗景靈宮由御街過朝天門經中瓦前直下回則自洋壩頭橫入龍翔宮自太平坊出御街寶祐癸丑十二月大火遂從御街當中取大路直入右瓦之

右以為武林園其左以為皇子忠王望湖樓其時旅
邸有題壁云龍翔宮闕壯皇都鑿路縈迴枉德車天
意也知明主意故教劫火闢通衢

沈公井巷可通修義坊者宋嘉祐中郡守沈文通於
六井之南引湖水絕河東至美俗坊為大井名曰南
井宋熙寧間井廢郡守陳述古疏湧金池為上中下
澣衣洗馬者不得及上池列二牖於門外其一赴三
池而決之河其一納之石檻比竹為五筒以引之並

河而東絕三橋入於石溝注於南井元祐間復廢民
率以七八錢買水一斛蘇子瞻復命僧子珪治之以
瓦筒易盛以石槽疏於朝即以子珪之號號其井曰
惠遷井井傍有奉慶院宋嘉泰元年僧智師建又有
小悟空寺今廢

大瓦巷北通保康巷元時詩婦朱淑真居此

石榴園巷通張司馬巷國初有鎮撫司

三橋街東通文錦坊西至湧金門北通剪刀街南過

惠遷橋

自羲和坊而東至肅義街過芳潤橋其街之南為鐵線巷普寧巷豐樂橋忠孝巷雙井巷安福巷北為固寧巷興忠巷安平巷馬市巷昇平巷南班巷

芳潤橋俗呼炭橋宋時為藥市又北為書坊沿河而南為善履坊

普寧巷即柴木巷宋時有柴木場於此通薦橋上中沙巷

豐樂橋宋有豐樂樓酒肆其北有橘園亭宋時此地
多樹橘號橘園高宗幸建康於此登舟作亭臨河故
稱橘園亭也亭傍有夏皇后宅十少保府其南為狗
兒山隱隱地中無可登陟其東有常惠井橋之上有
華光廟其北有青字營

忠孝巷舊名中沙巷

固寧巷內小巷曰諸投巷相傳宋時行市各有分地
而此巷獨無厲禁其北為油局橋宋時為油蠟局

馬市巷宋時為馬市於此東北通南班巷茅郎巷

昇平巷今為皮市內有上四眼井下四眼井玉陽庵
南班巷宋時宗室子列南班奉朝請者居之

自壽安坊而西至井亭橋其街之南為二僊巷興德巷
八僊巷鑷作巷成娘娘巷北為花市巷馬家營巷新房
廊巷

二僊巷元時詩人張光弼居之胡虛白挽詩云二僊
坊裏張員外頭白相逢只論詩今日過門人不見小

樓春雨燕歸遲

興德巷南通神堂巷

八僊巷宋有八僊茶坊其時茶坊之有名者曰八僊
曰清樂曰珠子曰潘家曰連二曰連三坊中插四時
花卉名人圖畫粧點店面所賣有七寶擂茶餛子葱
茶或賣鹽豉湯暑天則賣雪泡梅花酒或縮脾飲之
屬孟杓蓋子皆以銀為之亦同酒肆論一角二角茶
樓多富室子弟諸司下直人等會聚習學樂器上教

曲賺之類謂之掛牌兒人情

鑽作巷西連百子圖巷

成娘娘巷宋時皇后無成姓亦無賜宅於花市者俗云神娘娘巷豈訛而為成歟

花市巷宋時作鬻花朵者居之今壽安坊兩岸多賣花之家亦其遺俗也

馬家營巷錢王屯軍之所北通修文坊

自井亭橋而西為甘泉坊相國井

甘泉坊與井亭橋對相國井有二皆唐鄴侯李公泌所鑿也自江湖避錢唐而擊西陵沮洳鹵斥化為平原今之城市聚落皆江流故地也其水苦惡惟負山鑿井乃得甘泉而所及不廣唐宰相李泌當德宗興元時守杭州始作六井引湖水以濟民其最大者在古清河為相國井其西為西井又名化成井少西而北為金牛池又北而西附城為方井為白龜池又北而東至錢唐縣舊治之南為小方井金牛之廢久矣

出湧金門並湖而北有水牖二注以石溝貫城而東者相國方井之所從出也若西井則相國之別派也而白龜池小方井皆為匿溝湖底無所用牖此六井之大略也長慶間白居易績鄴侯之績而浚治之民以為利宗熙寧間六井皆廢民苦遠汲郡守陳述古命僧仲文子珪等董其事發溝易甃補苴罅隙而相國之水清冽溢流千艘更載而貿之元祐五年蘇軾復引六井餘波至威果雄武五營之間創為二井乾

道三年轉運周琮重加浚治淳祐七年安撫趙與憲
自湧金門北至錢唐門水口所入咸作石櫺禁民不
得植芟荷以穢水咸淳間內侍陳敏賢築室于靈芝
寺前劉公正于相國祠前洗馬御史鮑度劾之遂皆
奪職自宋迄今將三百年曠廢不理惟相國井西井
僅存而城中之井無慮數萬餘未必全賴六井也唐
宋守臣遞相修浚旋復壅塞蓋延引紆遠則筒槽崩
裂而相國西井至今不涸者蓋有自然之源不係于

水口之修不修也父老言大旱若宋淳祐間西湖龜
拆六井斷流獨吳山大井日下萬綆遠近賴之蓋自
宋以前城市地脈猶帶江滋故多苦惡迨今去江日
久土膏融液霖雨滲漉鹵斥全消淳釀甘淡凡井皆
良故六井之利不顯當鄴侯時民之仰賴者豈可同
日語哉 過井亭橋而西宋有俞家園諸天閣華嚴
院鶴林宮激賞庫卿監郎官宅 俞家園在宋初皆
荒池污畝芟稻雜植行潦所歸故諺云俞家園一雨

便撐船自為行都而閭閻輻輳遂成平原其南有九
官宅 諸天閣華嚴院晉天福間建尋燬宋紹興三
年重建丞相梁克家手書華嚴經一部建輪藏仍作
亭於相國井上元末燬 鶴林宮宋慶元間旱道士
劉友真者禱雨而應遂請以所寓舍崇奉天將賜額
曰鶴林 激賞錢庫以供三省樞密院公用者庫西
為小方井其激賞酒庫在錢唐縣南

自泰和坊而北至井亭橋其河之東為普濟橋侍郎橋

軍將橋施水坊橋河之西為油車巷曲阜橋欽善坊

普濟橋上有華光廟俗稱斷河頭合湧金之水過惠
遷橋軍將橋施水坊橋并亭橋洪福橋鞞鼓橋馬家
橋八字橋石湖橋結縛橋折而東過衆樂橋衆安橋
度生橋與市河合宋咸淳六年安撫潛說友因斷河
堙塞開至清湖橋凡四千二百一十丈

侍郎橋宋真宗時工部侍郎簡所居簡字叔廉性
和易喜賓客治園廬以蒔花木導引服餌顏如渥丹

善醫術至老不衰郡守孫沔表其里曰仁壽坊

軍將橋宋有茉莉園

油車巷之西宋有度牒庫德壽橋今廢入織染局

曲阜橋在靈壽寺坊前宋有韓樞密府

欽善坊舊名聞善子巷宋有柴場

自井亭橋而北過甘泉坊至清湖橋其街之東為洪福
橋鞞鼓橋馬家橋西為鮑生姜巷清風坊清河坊癸辛

街

洪福橋之對宋有紫雲坊東有樞密五房院西有惠利井又名王蓮池引湖水以入城者水口在舊玉蓮堂基北有楊和王府第王名存中本名沂中字正甫紹興間賜名存中代州崞縣人從高宗南渡累立戰功封和義郡王高宗假借諸將而眷存中尤深第當清湖洪福兩橋之間規制甚廣自居其中旁列子舍皆極宏麗落成之日縱人遊觀一僧善相宅云此龜形也得水則吉時和王方被殊眷從容為上言之欲

引湖水以環其居高宗首肯曰朕無不可第恐外庭
有言宜密速為之和王即督濠寨兵且募民夫晝夜
作陰道引水入自五房院出自惠利井蜿蜒縈遠數
百丈再宿訖事未幾臺臣有䟽言擅灌湖水私第以
象宮禁者上曉之曰朕南渡初羣盜蜂起用羈縻策
刻印封之所有淮淞數郡賴諸將宣力羣盜悉平朕
籍土地外府庫金帛俱置不問故諸將有餘貲以治
泉池第園以存中之功雖盡賜西湖曾不為過况此

役已成願卿等容之言者遂止既復建傑閣藏思陵
御劄以御書風雲慶會四字扁之蓋取大龜俯首下
視西湖之象以成僧說自此百餘年間無火災紹定
間其家捨閣于佑聖觀相者謂龜失其首次年五月
大火潭潭數百楹不數刻而燼云

鞞鼓橋之對宋有崇訓坊

馬家橋之對宋有孝慈坊

清風坊宋稱活水巷有莊文太子府

清河坊宋稱古清河坊

癸辛街相傳楊和王建子第於府側取癸辛方向其門巷曰癸辛街宋季周密公謹居此所著有癸辛雜識齊東野語元時有省府廣濟庫洪武初賜為曹國公李文忠宅永樂間籍於官今為民居

清湖橋與洗麩橋分跨兩河若八字然故名八字橋其水過安濟橋安福橋丁家橋長生老人橋紀家橋車橋長壽橋新莊橋師姑橋中正橋出城外

西湖遊覽志卷十三

欽定四庫全書

史部

西湖遊覽志卷十四至
九

詳校官太僕寺少卿臣李廷欽

刑部郎中臣許兆椿覆勘

總校官編修臣王燕緒

校對官中書臣葉蘭

謄錄監生臣張元任

欽定四庫全書

西湖遊覽志卷十四

南山分脈城內勝蹟

衢巷河橋

明 田汝成 撰

入湧金門而東至三橋街其街之南為湧金池轉運橋
永安橋惠遠橋北為鑷子井友助巷焦雞巷六房巷

湧金池吳越王時金華令曹杲所鑿也楊蟠詩湧金

春色晚吹落碧桃花一片何人得流經十萬家郭祥
正詩衆治皆涵璧斯池獨湧金寶光終夜見不是月
華深

轉運橋俗稱渡子橋從此而南為普安橋在運司前
河西有桑園巷併入運司又南為福寧橋與油車巷
相通併入織染局又南為凌雲橋在府學前其對宋
有豐豫坊

永安橋在織染局前宋稱臺後橋

惠遷橋一名金文橋其南宋有金文酒庫內有羅漢洞壘石嶇嶽塑羅漢於其下其里宋名善俗坊又南為太常寺昭勲崇德閣繪趙普曹彬等二十四人從祀太廟者內有汲古泉又名觀音泉乃法慧寺舊井宋時有石刻云此泉清甘雖旱不竭故老相傳飲之有疾者愈宣愛護之嘉泰改元立石今歸布政司

鑷子井在上方寺南水口在湧金門外城下有水門成化十二年所開者引西湖之水由柳洲寺後入城

過紅蓮花橋白蓮花橋出曲阜橋合西湖之水

友助巷俗稱四條巷北通洗布園

六房巷與臺後橋對舊有如意橋北為帳前營

入清波門而東至龍舌頭其街之南為菜市巷鐵冶嶺
郭璞井巷金剛嶺巷螺獅山巷聯桂坊北為聖祖巷四
條巷石板巷闕王廟巷

鐵冶嶺宋名豐寧坊南上雲居山者街左仁靜巷宋
有景獻太子府嶺下有相公井紹興間節度使趙密

所浚

郭璞井相傳晉郭景純所相度者蓋其時杭城苦斥
澗之水甘泉難得景純善相地脈故凡美井多託郭
氏為名土人訛為郭婆井

螺獅山一名狗兒山上通烏龍潭

聯桂坊元至元間有周氏兄弟舉進士並登甲榜故
名

聖祖巷直北為荷花池

四條巷通塔兒頭

清波門之南宋有錢湖門今塞門之內有牙兵寨虎翼營教駿營騏驎營白鱖井

入候潮門向西折而北透永昌門大街至下馬坡其街之東過諸家橋為烏盆場巷東花園道義巷大覺巷高陽閭巷西為大營巷官井巷談郎步巷撫寧巷獅子巷福地巷大德街廣福巷

候潮門宋時西向元時改西北向入門宋有都亭驛

驛左有打繩巷侍從官宅從此而西直六部橋稍北
為州橋有吳太后宅元有金王總管府

候潮門之東舊有茅山高可尋丈有河經之曰茅山
河入保安水門過保安橋過軍橋折而北合流通江
橋

烏盆場巷南通水門

東花園宋時此地多名園高孝兩朝嘗幸東園閱市
至今有孔雀園茉莉園等名

高陽閭巷俗訛為羔羊巷內有慈雲寺巷口為羊市

大營巷東通勝安倉

撫寧巷內有伏虎廟

獅子巷折北有祇園寺

福地巷折北有旌德觀國初有浙西分巡道其北通

姚園寺巷

廣福巷舊名寨口巷

馬坡巷宋時稱馬婆巷蓋其時在城外馬院近之教

駒遊北皆于此地故名馬坡耳自東花園而南為上馬坡北抵清泰門大街為下馬坡

入永昌門而西過昇僊橋至望仙橋其街之南為上馬坡巷竹竿巷總寧巷武寧巷北為保安巷下馬坡巷演教寺巷什物庫巷板兒巷馬院巷

竹竿巷南通獅子巷北對板兒巷

總寧巷俗稱竹椅巷南通保安橋北對馬院巷

武寧巷一名牛羊司巷宋建牛羊司于此掌御膳及

祭祀之牲有滌宮在赤山

保安巷俗稱水仙巷

演教寺巷內有演教寺

什物庫巷宋時建什物庫于此

板兒巷一名白花蛇散巷北有景隆觀靈順宮金剛

寺安樂園平安一橋平安二橋平安三橋俗稱為鬪

富橋乃斷河之水也

馬院巷宋建馬院于此內有馬眼井

望仙橋之東宋有德壽宮蔣院使花園紹興十五年
四月秦檜建第落成初望氣者言此地有鬱葱之祥
檜專國實覬覦焉請以為第檜死高宗將倦勤乃即
第築新宮名德壽紹興三十二年禪位于孝宗遷居
之以朝禁為南內以此宮為北內鑿池引水疊石為
山象飛來峰建冷泉亭規制宏麗詳見偏安佚豫志
中孝宗內禪移居此宮改名重華後寧宗以奉憲聖
太皇太后改名慈福壽成皇太后居之改名壽慈當

高宗時得盤松一本于聚景園中移植宮苑竒秀絕
倫高宗嘗自為贊曰天錫瑞木得自嶽岑枝蟠數萬
榦不倍尋怒騰雲勢靜奏琴音凌寒鬱茂當暑陰森
封以腴壤邇以碧潯越千萬年以慰我心又嘗躬製
祭文祈神保護其文曰維淳熙五年歲次戊戌十一
月日太上皇帝遣具階張宗尹特設牲牢旨酒珍菓
香花致祭于本宮土地之神神有百職職各不同典
司草木土亦是供我遊湖園乃獲竒松植之禁苑百

態千容婆娑偃蓋天矯騰龍翠色凝露清音舞風醉
吟閒適予情所鍾壅培封殖久或力窮烏烏外擾蟻
蠹內攻神其勦絕勿使能終精邪竊據盜斧適逢神
其呵逐勿使遺蹤常令勁節坐閱隆冬堅踰五柞弱
異雙桐歷千萬年鬱鬱葱葱牲牢旨酒嗣錄汝功尚
饗

入清泰門而西過崇新橋春熙橋至清泰橋其街之南
為水仙巷安肅坊崇新巷南場巷春熙巷九曲巷佑聖

巷義井巷寧海巷北為同德坊蒲場巷崇新巷石板巷
北場巷熙春巷豐禾巷高橋巷忠孝巷

安肅巷南通下馬坡內有香餅園菩提巷

崇新巷南通板兒巷

春熙橋一名裝駕橋相傳宋高宗自越州渡江還臨
安泊舟裝駕于此蓋其時橋在城外故也土人訛為

臧家橋

南場巷北對北場巷內有假髻兜

春熙巷北對熙春巷

九曲巷對小學巷

佑聖巷南通佑聖觀

義井巷俗稱四眼井咸淳志云水宜染紫

寧海巷俗稱林木梳巷

同德坊南對安肅坊北為北營

崇新巷自北而西為淳佑橋直北為橫河橋

石板巷內有葫蘆堦

熙春巷宋有雙茶坊

豐禾巷宋有豐禾倉

忠孝巷俗稱中沙巷北通回回新橋舟行上河者樣
此

入慶春門而西至延定坊其街之南為新開路蒲場巷
普庵坊瓦子巷過菜市橋為保信巷舊城基肅義坊福
佑巷過蒲橋為上八界巷下八界巷清寧巷過惠濟橋
為興忠巷嘉新坊延定巷北為文東巷清平街花斗巷

信善巷東清巷忠清里安衆巷小福清巷七寶巷大福清巷木場巷醋坊巷

新開路舊名麻柴巷又名刀茅巷

瓦子巷宋名菜市橋瓦

菜市橋舊在門外上唐沙地宜菜故宋時有東菜西水南柴北米之謠其河曰菜市河又曰東運河其源本通保安水門自宋築德壽宮而堙之故稱斷河頭也其水過鬪富橋春熙橋淳祐橋橫河橋慶春橋壩

子橋出艮山水門

保信巷一名保寧巷南通回回墳中班街

舊城基元時禁天下修城故杭城日毀至正十九年
張士誠據兩浙改築杭城自艮山門至清泰門展出
三里而絡市河于內此其舊基也

肅義坊內有佛慧寺

福祐巷俗稱皮市巷折而西南有荷花池紫瓊觀

蒲橋東堍宋為昌樂坊

下八界巷宋有崇恩延福院

清寧巷內通西北巷

惠濟橋俗稱鹽橋宋時鹽船待權于此上有廣福廟
西塊宋為興德坊

興忠巷南通豐樂橋

嘉新坊俗稱七郎堂巷又稱祖廟巷國初有鎮撫司
延定巷俗名糲子巷

文東巷北有潮鳴寺回龍橋

花斗巷內有多佛寺

信善巷一名信扇巷

東清巷內有半升寨海螵溝

忠清里本名昇平巷北為褚家堂正德十六年里人胡世寧為都御史時御史唐鳳儀按浙欲為世寧建坊於門閭世寧辭之曰僕計偕時已得坊費後遭宸濠之難被逮京師當道義助補前之缺家人先後妄費非有司不曾加惠也豈敢瞞昧再叨厚貺竊念僕

居近褚堂以遂良故里得名近世同里有王公琦者
歷官教職御史僉事皆有政蹟而清介絕俗晚年休
歸枵腹以歿諸孫見為傭工項公麒者歷官司務員
外郎中文學廉孝冠絕一時而病歸四十餘年閉戶
以終一子貧贅依人蓋以俗尚通達而賤方介以致
二公泯滅如是也此堂街口有平安坊蓋取在籍坊
名為額今廢已久欲請于官復造一小石碑上刻三
公名氏更題曰忠清里以勵夫人而後死者亦與有

榮馬鳳儀從之嘉靖二十六年布政使李默併勒世
寧名于上里內東有樞密巷鈐轄巷宋有鈐轄司威
乙巷西有大東門轉南樓子營鑿石巷大夾道小夾
道梅東巷

安衆巷內有青字營錢王所立

七寶巷內有七寶寺

醋坊巷宋時有醋庫十二一在此一在府街後一在
菜市橋一在小新營一在棚北橋一在洋壩頭一在

井亭橋一在朝天門一在三橋一在龍舌頭一在范浦一在江漲務

入艮山門折而東南為廣豐倉廣積倉淳祐橋巷白洋池田家灣通濟橋梅家橋

廣豐倉在艮山門內河西

廣積倉在艮山門內河東

白洋池在通濟橋東周三里深不可測時有神物潛焉宋淳祐丁未大旱湖水皆涸茲池汪濊如故郡人

趨汲之至有攜鷺市中者池上有張家寺
通濟橋俗稱梅東高橋其傍有臘脂橋

西湖遊覽志卷十四

欽定四庫全書

西湖遊覽志卷十五

明 田汝成 撰

南山分脈城內勝蹟

官署

巡撫都察院巡按察院巡鹽察院清軍察院布政使司
布政分司都指揮使司都轉鹽運使司杭州府杭州前
衛杭州右衛仁和縣錢塘縣杭州府儒學仁和縣儒學

錢塘縣儒學織造府吳山書院市舶司杭州府稅課司
武林驛鹽倉批驗所惠民局

巡撫都察院入裕民坊在通江橋東舊為清軍察院
嘉靖二十六年以海寇擾越中設都御史提督軍務
以此為行臺

鎮東樓舊名保安樓總制新安胡公宗憲建萬曆十
一年司馬銅梁張公佳胤重建規制雄偉為會城大
觀張公自為記

巡按察院在正陽門北元時置江南行御史臺歲遣
監察御史二員分巡省地當時有兩察院一在按察
司右紀家橋邊者名北察院守省御史居之一在朝
天門外正陽門北者名南察院監燒緝鈔御史居之
即今所也國朝歲遣御史分巡浙江則猶元時守省
之職而按察使副使僉事與御史叅舉吏治其初權
等耳乃今重內輕外而激揚之權總歸御史矣

巡鹽察院在宗陽宮東舊為太平興國傳法寺基南

宋初普照法師建皇明正統三年遣御史巡視兩浙
催督鹽課遂改寺為行臺

清軍察院即今巡撫都察院也舊為三皇廟廢址先
是清軍御史寓西天寺正德間改建于此

布政使司宋南渡初為殿司寨尋改安撫司治復改
秘書省元至元間遷江淮行省于此總兩浙福建江
西四道并開元宮址廣之至正十九年析福建一道
置行省國初天兵平浙因元舊置浙江行中書省洪

武九年改承宣布政使司置左右布政使叅政叅議
十五年割直隸嘉湖二府來屬屬府十有一州一縣
七十五司內有紫薇樓門外百獅池皆宋元故稱蓋
紫薇中書省之號而百僚師帥亦宰相之法像也樓
後有山疊石蒼翠嘉樹森列乃元時丞相伯勒齊爾布
哈所治山下有松化石節理宛然枯枿也經歷司照
磨所理問所司獄司廣濟庫皆在司內

宋秘書省以藏累朝御著信史古書彝器名畫汪京

建于禁中紹興初寓法惠寺十三年始建于此省內
有右文殿秘閣國史院道山堂著作之庭國史日歷
所書庫寶庫羣玉堂席珍亭渾儀臺其前有方等院

淳熙五年九月二十日孝宗臨幸秘書省賜丞相
史浩以下官詩云玉軸牙籤煥寶童箬紳侍列映秋
光宴開雲閣儒風盛坐對蓬山逸興長稽古右文慙
菲德禮賢下士法前王欲臻至治觀熙洽更罄嘉猷
為贊襄著作權禮部郎呂伯恭和云麟閣龍旗日月

章中興再見赭袍光仰觀焜燿人文盛始識扶持德
意長功利從今卑管晏浮華自昔陋盧王願將實學
酬天造敢効明河織女襄又獻詩二首云麟臺高柳
識琯輿共記中興幸省初黃道再傳天子蹕青編重
入史臣書需雲下際君恩盛晨露高張樂節舒若寫
鴻猷參天雅定非周鼓頌畋漁又云紫清丹極與天
隣闔闢乾坤繫笑顰獨為斯文回一顧坐令吾道重
千鈞先王舊物參差見列聖明謨次第陳墨客區區

感榮遇豈知深意在彛倫 周公謹遊秘書省記云
乙亥歲秋監丞黃汝濟以蓬省勾點邀予偕行予于
是具衣冠望拜右文殿然後遊道山堂堂故米老書
扁後以理宗御書易之著作之庭胡邦衡所書曰蓬
齋曰羣玉堂堂屏坡翁所作竹石相傳淳熙間南安
守取之長樂寺壁間去其故土而背施髹漆匣以持
獻曾海曾殂復獻韓平原韓誅簿錄送官左為汗青
軒軒後多古桂兩傍環石柱二小亭曰蓬萊曰濯纓

曰方壺曰含章曰茹芝曰芸香射亭曰繹志曰采良
門采良二字莫知所出登渾儀臺觀銅渾儀紹興間
內侍邵諤所為精緻特甚色澤如銀如玉此器凡二
一留司天臺一留此以備測驗最後步石渠登秘閣
兩旁皆列龕藏先朝會要及御書畫別有朱漆巨匣
五十餘皆古今法書名畫也畫皆以鸞鵲綾象軸為
飾有御題者則加以金花綾每卷表裏皆有尚書省
印防閑雖甚嚴而往往以偽易真殊不可曉其佳者

有董源畫孔子笑魚丘子圖唐摹顧愷之洗經圖此
二圖絕高古李成重巒寒溜孫太古誌公展子虔伏
生無名人三天女亦古妙燕文貴紙畫山水小卷極
精又關仝山水胡環馬陳晦伯文與可古木便面亦
奇餘悉常品不滿十焉暇日想像書之以為平生清
賞之冠也

布政分司五曰管糧道在峨眉山麓曰杭嘉湖道在
朝天門外舊為巡視都察院元時西天寺舊基也延

佑間西僧班迪達降香普陀山過錢唐建此曰金衢
巖道在太平坊舊為鎮守府後宅曰溫處道在本司
儀門外曰寧紹台道在運司河下

都指揮使司本元行宣政院也洪武三年置杭州衛
都指揮使司其時徐司馬以其故址開建八年改為
浙江都指揮使司設都指揮使同知僉事而王誠陳
垣又拓大垣廨遂以前右二衛附焉其經歷司斷事
司司獄司皆在司內

都轉運鹽使司在湧金門內本宋轉運司治也太平興國二年開署于鳳凰山雙門內熙寧間徙建今所職司漕輓訊訟牒諏民利病領郡縣學校應詔選士其權甚重鹽課特其瑣事耳元至正十四年改為都轉運鹽使專掌鹽課國朝因之設運使同知副使判官經歷知事

杭州府自吳越王已前在鳳凰山下宋南渡取為行宮徙州治于竹園山淨因寺故址元時改為杭州總

管府皇明改為杭州府設知府同知通判推官屬縣
九經歷司照磨所司獄司皆在府內其府治正廳元
時扁曰宣化後堂宋時扁曰簡樂洪武十五年郡守
阮友竹扁曰思政嘉靖二十一年郡守陳仕賢建別
館于儀門之外扁曰親賢宋有中和堂簡樂堂見廉
堂聽雨軒恕堂愛民堂承化堂三桂堂吏隱堂講易
堂清明平軒景蘇堂玉蓮堂香遠樓並廢 中和堂
舊在鳳凰山府治嘉定間安撫趙時侃建之以存舊

跡簡樂堂即今後堂是也時光宗以太子領尹奏書
有訟簡刑清百姓和樂之語後二年郡守胡與可乃
摭簡樂二字扁于堂且丐御書司業薛元鼎為之記
見廉堂咸淳間安撫潛說友得璽書有足見廉能之
褒遂建堂而扁之曰見廉聽雨軒景定間安撫劉良
貴建恕堂紹定間安撫金天錫建愛民堂淳祐間安
撫趙與憲建承化堂三桂堂嘉定間安撫袁韶建吏
隱堂紹興間安撫張澄建講易堂即吏隱堂也隆興

初陳輝改建清明平軒潛說友建景蘇堂景定間安撫魏克愚建以文忠公嘗守郡有治績也玉蓮堂亦舊府治所有後守重建于此魏克愚徙之錢唐門外潛說友遂即其廢址為香遠樓高出城表平挹西湖山翠橫陳芙蓉布渚香遠而益清為郡署最勝

杭州前衛指揮使司舊在錢唐門太平坊洪武八年徙都指揮使司大門之左統五千戶所

杭州右衛指揮使司舊在泰和坊洪武八年徙都指

揮使司大門之右統五千戶所

仁和縣舊名錢江縣吳越時在梅家橋西宋紹興三年遷觀橋東招賢坊元初遷于府左皇明洪武初復遷招賢四年知府劉文以縣附府為便仍遷府左乃元時錄事司舊址也宋有無倦堂安敬堂

錢塘縣漢魏時在靈隱山麓平帝時更名泉亭尋復名錢唐徙錢湖門外唐武德四年避國號改唐為塘徙錢塘門裏宋南渡後建景寧宮復徙紀家橋華嚴

寺故址皇明洪武四年知府劉文徙于府右宋有畫
簾堂勤清軒

杭州府儒學在運司河下府治之東宋初在通越門
外鳳凰山之右紹興元年徙建于此并令府治皆淨
因寺舊基也嘉定九年教授袁肅黃灝言于朝拓大
之楊簡為記紹定四年戶部侍郎余昉增置學田周
端朝為記元至正十二年燬于寇守臣特穆爾勒斯購
禮佛寺之南得地八丈提舉王大本為記二十二年

又燬守臣夏思忠盡購禮佛寺地南北二百步東西一百六十步提舉楊翮為記皇明洪武八年重新之永樂十八年火宣德初大理寺卿熊槩以上命重建正統元年按察使軒輓增建號舍其制左為大成殿右為明倫堂即宋時養源堂也宋有八齋曰進德曰興能曰登俊曰持正曰崇禮曰賓賢曰志道曰尚志元減為六又減為四曰志道曰據德曰時習曰日新今仍之後為崇文閣即宋時稽古閣也俗稱尊經閣

內有宋高宗御書易詩書左氏春秋中庸大學學記
儒行經解論語孟子等篇石刻臨安府尹趙磻老于
太學建尊經閣積墨本閣上奠石刻閣下宋亡學廢
元改為西湖書院皇明改仁和縣學後學徙而石刻
從之正德十三年提學副使徐蕃徙置府學而聖賢
像贊宋理宗道統十三人贊蘇子瞻表忠觀碑皆在
焉學前為凌雲橋即宋志所稱凌家橋 昌文侯祠
本學土神也侯為徐文慶宋岳武穆王飛部將有戰

功飛死侯遂不祿孝宗理飛寃褒崇及其部將遂賜
侯為昌文侯牒充太學土神令仍奉祀焉 鄉賢祠
在儀門外舊祀嚴子陵以下一十六人皇明洪武中
教授徐一夔增祀六人漢處士富春嚴光晉臨海太
守錢唐范平晉中尉錢唐褚陶晉處士富春孫晷齊
處士鹽官顧歡梁參軍錢唐褚修梁處士錢唐范琰
唐右僕射錢唐褚遂良唐禮部尚書鹽官褚無量唐
大都督鹽官許遠唐諫議大夫給事中新城羅隱宋

侍中臨安錢惟演宋和靖先生錢唐林逋宋知制誥
寓富陽謝絳本陳郡人宋諫院臨安錢彥遠宋八行
先生仁和崔貢宋府學教授錢唐吳師仁宋贈太師
鹽官張九成宋工部侍郎臨安滕茂實宋端明殿學
士於潛洪咨夔宋吏部侍郎臨安俞烈宋知處州事
昌化章樵宋刑部尚書餘杭趙汝談宋刑部侍郎寓
鹽官楊由義本汴人宋將作監丞富陽李執宋右丞
相富陽李宗勉宋處士寓錢唐謝翺本閩人宋處士

富陽朱清元尚書右丞富陽葉李元石塘先生寓錢
唐胡長孺本永康人元湖南肅政廉訪使寓錢唐鄧
文原本綿州人元處士寓錢唐劉護本莆田人元處
士錢唐劉汶元江浙儒學副提舉錢唐白珽元溧陽
州儒學教授錢唐仇遠元處士錢唐吾衍元寧國路
推官寓錢唐楊載本浦城人皇明四川按察司僉事
仁和王琦

仁和縣儒學宋紹興三年縣令孫廷直始建于觀橋

之北即今貢院基是也洪武十一年教諭沈尊訓導
卜埜瞿佑病其卑隘而宋太學在前洋街元改為西
湖書院者頗弘敞尊等言于朝請改為縣學上許之
天順三年巡按御史闔劄以其迫近臬臺乃徙府學
之右本元時試院也中為明倫堂即宋時彛訓堂宋
為四齋曰教文教行教忠教信元因之今減為二齋
曰正心誠意

錢唐縣學宋紹興間建于長生老人橋西嘉熙四年

趙與權斥大其址至正十二年燬于兵皇明洪武三年知縣邵復亨以湫隘購地佑聖觀之西遂以建學九年僉事潘繼祖重新之正統初按察使軒輓增建號舍為門曰集賢景泰間副使鄭彥譽增置什物宋分六齋曰友善辯志教文教行教忠教信元減為四今減為二曰進德修業

織造府在旗纛廟西掌供御用袍服以中官掌之洪武二年初建織染局于斯如坊朱家橋永樂中因地

卑濕分撥工料於湧金門建局織造遂以舊名南局
此名北局後南局盡廢而工料併歸北局

吳山書院故鎮守府也元時為平準行用庫俗稱倒
鈔庫國初因之正統間命內臣鎮守各省改為府署
嘉靖間革除鎮守改為吳山書院

市舶司本宋德壽宮後圃也永樂中命內臣掌海舶
互市于此內有芙蓉石高丈許竇穴玲瓏蒼潤可愛
嘉靖中改為南關公署

杭州府稅課司在文錦坊西洪武五年建

武林驛在芝松坊吳元年建于武林門外洪武二年徙建于此

鹽倉批驗所在艮山門內元時名檢校批驗所國初因之洪武十五年改今名

惠民局在吳山書院北洪武十七年置醫學于此

西湖遊覽志卷十五

欽定四庫全書

西湖遊覽志卷十六

明 田汝成 撰

南山分脈城內勝蹟

祠廟

旌德觀蕭相國廟關王廟助聖廟東平忠靖王廟千勝
將軍廟鄴侯祠金華將軍廟昭節廟三忠祠忠烈祠廣
福廟旗纛廟憐忠祠揚清祠三太傅祠褒忠祠

旌德觀在保安坊內舊名先賢祠宋寶慶二年京尹
袁韶建於蘇堤以祀鄉名士烈女共三十九人人各
為贊其名士為唐時陽城許由漢時富春嚴光吳時
餘杭凌統晉時錢唐范平褚陶富春孫惠宋時錢唐
范叔孫餘杭卜天與齊時錢唐杜京產褚伯玉鹽官
顧歡梁時錢唐范述曾范元琰褚脩唐時錢唐褚亮
褚遂良鹽官褚無量許遠於潛童成緬後梁時臨安
錢鏐新城羅隱宋時錢唐錢俶錢彥遠錢明逸錢勰

林逋郎簡沈文通吳師仁虞奕仁和崔貢餘杭陸誥
鹽官張九成富陽謝絳烈女則晉時富春孫夫人唐
時錢唐馮孝女等明年詔易其額曰旌德觀中書王
堅為之記元時改建今所國初燬成化十一年道士
許道昌史志中重建時叅政張寰僉事李璫倡義助
之傳烈女之祀而增府學所祀鄉賢共五十五人

蕭相國廟在弼教坊內以奉漢鄴侯蕭何者宋時廟
在汴京南渡後建廟於此蓋戒民坊為戮人之市而

蕭何定律令平刑獄義有所取耳嘉靖十四年燬道士蔡如樟重建

闕王廟在羲和坊以奉漢漢壽亭侯闕雲長者宋嘉定間建元末燬洪武三年道士吳一清重建

助聖廟在忠清里以祀唐僕射褚遂良者遂良字善登錢唐人博涉文史工隸楷貞觀中累遷起居郎侍書在任多謹言太宗欲自觀史遂良諫言未聞天子自觀太宗曰朕有不善卿必記也對曰臣職載筆君

舉必書時魏王泰禮秩如嫡遂良諫太子諸王宜有
定分太宗嘗怪舜造漆器禹雕其俎諫者十餘不止
遂良曰奢靡之始危亡之漸也漆器不止必金為之
故諫者救其源時皇子皆外任都督刺史遂良諫曰
刺史民之師帥也臣謂皇子且教以經學養成德器
審堪臨州然後遣帝許立魏王泰為嗣遂良曰若必
立泰非別置晉王不可帝即詔長孫無忌房玄齡與
遂良等定策立晉王為皇太子帝欲自討遼東遂良

言非萬乘六師所宜行進黃門侍郎叅綜朝政高麗
逆臣莫離支貢金遂良引魯納部鼎之事諫止帝于
寢宮側別置院居太子遂良上諫父子滯愛者多愆
拜中書令帝疾召遂良無忌受遺詔高宗即位拜右
僕射帝將立武昭儀遂良曰皇后無他過不可廢昭
儀昔事先帝今立之奈天下耳目何遂良因致笏殿
階叩頭流血曰歸陛下此笏乞放歸田武氏立遷潭
州都督徙桂州貶愛州刺史卒父亮散騎常侍弘文

館學士祖玠陳秘書監曾祖蒙梁太子中舍人高祖
湮梁御史中丞並著名前史

東平忠靖王廟在秀義坊內以奉唐將張巡許遠南
霽雲姚閻雷萬春者巡南陽人遠鹽官人天寶十五
載安祿山反時巡為真源令起兵討賊守雍丘與賊
將令狐潮大小數百戰帶甲而食裹瘡而鬪時有大
將六人以勢不敵白巡請降巡陽許諾明日設天子
像率軍士朝之人人盡泣巡引六將責以大誼斬之

士心益勸戰守積六旬馬裁三百兵三千遂至睢陽
與太守許遠城父令姚闔等合遠與巡同年生而長
巡呼為兄遠自以材不及巡讓巡而居其下巡受不
辭霽雲萬春咸彊毅善射時賊將尹子琦楊朝宗等
以十餘萬衆圍困睢陽經年乏食士日賦米一勺齧
木皮革紙而飽者才十餘人皆癯劣不能發救兵不
至巡出愛妾烹以啖衆遠亦助以奴僮至羅雀掘鼠
煮鎧弩以食巡遣霽雲如賀蘭進明乞師不得請進

明饗之樂作霖雲泣曰昨出睢陽時壯士不粒食已
彌月今大夫兵不出而廣設聲樂義不忍獨享雖食
弗下咽因拔佩刀斷一指卒不食去賊知外援絕圍
益急士病不能戰巡西向拜曰孤城備竭弗能全臣
生不報陛下死為鬼以瀆賊城遂陷與遠等俱被執
巡罵賊不屈與霖雲萬春閻等三十六人皆遇害尹
子琦送遠洛陽至偃師亦以不屈死後封巡東平王
謚忠靖唐史贊曰張巡許遠可謂烈丈夫矣以疲卒

數萬嬰孤墉抗方張不制之虜鯁其喉牙使不得搏
食東南牽掣首尾殛潰梁宋間大小數百戰雖力盡
乃死而唐全得江淮財用以濟中興引利償害以百
易萬可矣巡先死不為遽遠後死不為屈巡死三日
而救至十日而賊亡天以完節付二人畀名無窮不
待留生而後顯也廟建于宋建炎二年元末燬皇明
洪武三十年里人吳興捐貲重建布政使王鈍為記
金龍四大王祠萬厯間建沈友儒記

千勝將軍廟在新安坊其神張亞夫者巡子也拜金
吾大將軍立廟雒陽宋南渡時凡汴京有廟者皆得
祀于杭故建廟于此元元統間燬皇明洪武間僧廣
成重建

鄴侯祠在井亭橋西鄴侯李泌字長源京兆人唐玄
宗時以奇童召見及長博學善治易嘗游嵩華終南
間慕神仙不死術天寶中待詔翰林楊國忠等嫉之
斥置蘄春郡肅宗即位泌謁見陳天下所以成敗事

帝悅欲授以官固辭願以客從入議國事出陪輿輦衆指曰着黃者聖人著白者山人帝聞因賜金紫拜廣平王行軍司馬益親信用事李輔國嫉之泌畏禍願隱衡山有詔給三品祿賜隱士服為治室盧泌嘗取松樛枝以隱背名曰養和後取如龍形者因以獻帝四方爭效之代宗立召至舍蓬萊殿初泌無妻不食肉帝強詔食肉納婦焉元載惡不附已出為江西觀察使判官載誅帝詔還復為常袞所忌出為澧朗

峽團練使徙杭州刺史有惠政鑿六井引西湖水入
城市以便民取汲德宗在奉天召授散騎常侍貞元
三年拜中書侍郎同中書門下平章事累封鄴縣侯
未幾卒史臣贊曰泌之為人也異哉其謀事近忠其
輕去近高其自全近智卒位建上宰近立功立名者
觀肅宗披榛莽立朝廷單言暫謀有所寤合皆付以
政當此時泌于獻納為不少又佐代宗收兩京獨不
見錄寧二主不以宰相器之耶德宗晚好鬼神事乃

獲用蓋以恠自置而為之助也鄴侯既薨杭人感其
惠立祠于此翼以僧舍俗稱西井寺宋淳熙十一年
賜安國羅漢教寺額景定五年改嘉澤廟元季燬祠
廢而寺猶存成化間都指揮王景端重繪侯象布政
使楊維高拓故祠而奉之至今祠寺並建祠前有井
徑丈許底與湖通鄴侯所鑿也井中金玉魚數百頭
游泳喁噏滋孔日繁

金華將軍廟在湧金門內其神曹杲者真定人仕後

唐為金華令時郡兵叛杲以計平之吳越王嘉其功
就擢婺守宋初吳越王入朝委以國事遂即城隅浚
三池引湖水入城以便舟楫王歸嘉之題曰湧金立
石池上杲卒郡人立祠祀之

昭節廟在保安坊其神曰喬亢陸軌襄漢人仕周為
殿侍東三班宋太祖受禪自宣祐門入守者拒弗納
乃自移門入既受朝賀即召宣祐門守者一班皆自
殺太祖大驚趨救之得不死者二人詢之乃喬陸也

改班長入以青紅二色帛為帽飾二人既出復自殺
太祖義之命立祠祀之南渡後立廟于杭州適郡城
大火空中見青紅二旗書喬陸二字火遂息民益神
之事聞孝宗賜額曰昭節

三忠祠在羲和坊東舊名旌忠廟今覺苑寺是也其
神曰高永能景思誼程博古宋元豐間同為統軍禦
虜銀川戰死廟食于鳳翔和尚原宣和間方臘寇睦
州討捕者禱神而勝敵上其事始封為侯南渡後張

浚吳玠總兵鳳翔神屢以陰功助武朝議嘉之加封
王爵建廟于望仙橋北額曰旌忠俗稱三聖廟今三
聖橋是其所也高宗將建德壽宮徙置今所廢覺苑
寺以居之皇明宣德中重建覺苑寺遂奉神為寺土
神

忠烈祠在衆安橋南以祀宋封總忠侯岳雲烈文侯
張憲者雲乃武穆之子憲為武穆部將或云其壻也
此橋為二侯就戮之所里人憐其寃立祠祀之正德

十五年巡鹽御史劉藥拓大其基叅政鄒虞為記

廣福廟在鹽橋上其神曰蔣七郎崇仁者里人也仗
義樂施倣常平法以家貲糴穀賤糶以救貧者其弟
崇義崇信亦承兄志行之六七年規以為常里人
德之比卒即其家立祠祀之有禱輒應咸淳初京尹
潛說友請于朝賜廟額曰廣福封崇仁孚順侯崇義
孚惠侯崇信孚佑侯淳熙間京尹韓彥質將改作其
祠神忽憑老兵言願徙橋上遂立廟焉士女爭趨之

日擁溢橋東西十餘丈至不得旋踵兩街沽酒作餐
餌驚象馬錢二三十家供給不暇至今父老言神異
事甚多而石塘胡長孺為神作傳述宋時劉宗申事
獨著云劉宗申者暴戾士也以縱橫說游蜀荆江淮
間客李曾伯所怨曾伯子杓誣以陰事罪至死曾伯
納官以贖猶除杓名劉借七寶寺館焉買妾置券盛
陳金銀器飲食妾父若牙僧夸示多藏奴薛榮刺知
藏處夜懷刃入劉卧中殺劉擇取藏物逃去捕急臨

安尹韓君矢侯曰三日不獲榮夷廟毀像榮卜往崇
德利韓君亦卜往崇德必見獲已而往崇德果獲榮
榮自言逃時常彷彿見邏人從而後以故不能去其
自疑若有攝者然也胡長孺曰前此四十四年在虎
林聞故老誦說趙忠惠公為臨安尹會城中見口日
食文思院米三千石民間又藉北關天宗水門米船
入四千石乃為平糴倉二十八廩於鹽橋北糴湖秀
蘇常州米置碓房舂治精善歲六十萬石輒取賤價

糴與民竟尹去十三年米價不翔民不食糲惡駟儉
不罹刑令口籍除去乘來與故時無懸殊若牧守人
効忠惠時規模民亦効孚順侯昆季飢歲尚使勿知
况平歲耶

旗纛廟洪武三年建于都督府後以祀軍牙六纛之
神每歲驚蟄霜降祭之八年都指揮使徐司馬改建
于普濟橋東詔停春祭歲霜降先一日本司以所製
軍器遶城迎之鼓吹殷作謂之揚兵至日乃祭

憐忠祠在清河坊內以祀皇明贈太傅于肅愍公謙者正統十三年英廟北狩謙以兵部尚書當國有功竟以誣戮弘治初勅建憐忠祠于其故第

楊清祠在褚家塘以祀皇明四川按察僉事王琦南京刑部郎中項麒者琦字文璣錢唐人永樂間舉于鄉除汝州學正尋授監察御史陞山西按察僉事提督學校以母憂去起復四川整飭兵備非其好也乞歸歷官清白家無石儲衣敝以紙補隙嘗歲暮大雪

僵卧數日人有憐而餽食者致恭則受稍怠即辭卻之曰吾不忍啖嗟來也郡守胡濬聞而餽之百金不受乃述其清行聞于朝以上命賜之琦復辭曰祿以養士未聞養民也無功而食將無愧于心乎士流莫不嘆服竟以飢寒發病卒麒字文祥仁和人景泰間以貢士授南京吏部司務遷工部營繕司員外郎成化初以母病乞改南京授刑部福建司員外郎陞江西司郎中以病告歸雅操尚潔不入公府嘗不給于

饗殮而吟詩鼓琴晏如也巡臺藩臬若郡縣之長欣
覲高標而麒終不肯屈節往見正德二年平湖令甯
某被逮于臬司憲長邵公諭之曰何不學項正郎清
白正人在邇而不往親炙自忍點染何也甯頓首出
齎百金入贄于麒厲聲曰君事果枉法司自能直
之苟不枉則受罪乃其所也既剝民以自斲復以斲
已者斲人是誠何心哉甯赧汗而退明日麒無疾而
卒年八十有二正德十六年御史唐鳳儀廉二公清

節以其與褚僕射同里也表其閭曰忠清里嘉靖十一年錢唐令王鉞立二公神位于褚祠併祀之二十三年提學副使孔天胤郡守陳一貫以凝真道院奉二公題曰揚清祠

三太傅祠在薦橋東舊十方寺基也當熙春橋西元僧伊嚕勒昆建久廢嘉靖二十一年吏部侍郎謝丕建祠以奉晉贈太傅謝安宋贈太傅謝深甫皇明贈太傅謝遷者安字安石會稽人年四歲桓彝見而嘆

曰風神秀徹當不減王東海及總角神識沈敏風宇
條暢善行書王導深器之寓居會稽與王羲之及高
陽許詢桑門支遁游處出則漁弋山水入則言詠屬
文無用世意屢名不起有司劾請禁錮終身安遂往
臨安山中坐石室臨濬谷悠然嘆曰此與伯夷何遠
安雖放情丘壑然每遊賞必以妓女從既累辟不就
而安妻者劉惔妹也見家門富貴而安獨靜退乃謂
曰丈夫不當如此耶安掩鼻曰恐不免耳年四十餘

始有仕進志征西大將軍桓溫請為司馬將發新亭
朝士咸送中丞高崧戲之曰卿累違朝旨高卧東山
諸人每相與言安石不肯出將如蒼生何蒼生今亦
將如卿何安甚有愧色頃之拜侍中遷吏部尚書桓
溫卒進安中書令尋拜衛將軍開府儀同三司時苻
堅率衆號百萬次于淮淝京師震恐兄子玄入問計
安夷然無懼色答曰已別有旨既而寂然玄不敢復
言乃令張玄重請安遂命駕出山墅親朋畢集方與

玄圍棋賭別墅安常棋劣于玄是日玄懼便為敵手
而又不勝安顧謂其甥羊曇曰以墅乞汝安遂游涉
至夜乃還指授將帥各當其任玄等既破堅有驛書
至安方對客圍棋看書既竟便攝放牀上了無喜色
圍棋如故客問之徐答云小兒輩遂已破賊既罷還
內過戶限心喜甚不覺展齒之折其矯情鎮物如此
薨贈太傅諡曰文靖 深甫字子肅台州臨海人少
穎悟刻志為學舉進士調嶧縣尉越帥方滋錢端禮

皆薦深甫有廊廟才調崑山丞為浙漕考官一時士
望皆在選中司業鄭伯熊曰文士在不乏求具眼如
深甫者實鮮深甫曰文章有氣骨如泰山喬嶽可望
而知以是得之知青田縣御史葛邲等薦之孝宗召
見奏對雍容除籍田令紹熙改元權給事中會韓侂
胄破格轉刺史深甫封還內降云侂胄薦越五官而
轉遙郡僥倖一啓攀援踵至請罷其命二年知臨安
府光宗面諭曰京尹寬則廢法猛則厲民獨卿為政

得寬猛之中每禁庭燕私左右有希恩澤者上必曰
恐謝給事有不可耳寧宗朝累拜右丞相尋以少傅
致仕薨以孫女為理宗后追封信王謚惠正 遷字
于喬餘姚人成化十二年舉進士第一累官修撰諭
德學士進大學士敬皇帝晏駕與大學士劉健李東
陽同受顧命輔殺皇帝即位正德初議政不合致仕
歸嘉靖初召進少傅兼太子太傅尋薨贈太傅謚文
正

褒忠祠在錢塘學宮之東舊為清軍公館萬曆三年
侍御萬安蕭公廩改祀國朝革除死事諸臣脩撰王
叔英博士方孝孺副使程本立都御史陳性善太常
少卿盧原質左拾遺戴德彛都給事龔泰戶部侍郎
卓敬盧迴谷府長史劉璟蕭縣知縣鄭恕東平州吏
目鄭華監察御史鄭公智陝西僉事林嘉猷檄有司
以時致祭云大學士呂本為之記

西湖遊覽志卷十六